



Progetu finantziau cun su dinai de sa Regione Autònoma de Sardigna cunformas a sa L. 482/99 e a sa L.R. 22/2018

## LUXIA ARRABIOSA

Biviat in Sardigna una coga chi si naràt Luxia Arrabiosa. Calincunu narat chi fiat manna manna, calincunu àteru pitichedda pitichedda, comentì una jana. Biviat in una gruta manna, e aintru ddoi teniat dònna cosa: cosa de papai, de bufai, prendas, oru e prata. A de dì Luxia dromiat e a su noti abarràt scida, si setziat in s'oru sa gruta aici chi nemus podessit intrai po ndi furai is cosas suas. E candu issa dromiat, su fusu acogau cosa sua agodràt sa domu: chi calincunu si acostàt a sa gruta, incumintzàt trotolai fintzas a candu sa meri si ndi scidàt. Una borta, candu s'ierru fiat longu e lègiu, i sartus fiant cungelaus e non cresciat nudda. In beranu non ddoi fiat trigu e in s'istadi nisciunu ddu podiat messai. Sceti Luxia Arrabiosa, chi fiat arrica meda, no iat sunfriù su fàmìni. Issa fiat aici arrica chi podiat agiudai sa genti, ma ingordigosa no iat arregalau nudda a nemus, nimancu unu granu de trigu. Una dì, una pariga de òminis iant detzidiu de furai calincuna cosa a sa coga bècia. Fiant andaus a chitzi, ca sciant chi issa de noti fiat scida ma a de dì dromiat. Candu si fiant acostaus a s'oru de sa gruta, su fusu iat incumentzau trotolai in pressi e fai unu sonu de bentu insurdadori. Luegus Luxia Arrabiosa si ndi fiat scidada e pesada. Is òminis si ndi fiant atzicaus e si fiant fuis a lestru, unu perou iat imbrunchiau e nci fiat arrutu a terra. Luxia dd'iat nau a tzèrrius: "imoì ti ddu fatzu biri deu ita bolit nai a mi ndi furai is cosas mias!" Su fusu iat torrau a trotolai fadendu sonu meda, poita non podiat sunfriri is tzèrrius de cuss'òmini. Si ndi fiat pesau a celu e a pustis si nci fiat ghetau in su forru, e si fiat abbruxau. Candu Luxia Arrabiosa iat biu su fusu suu abbruxendi, disisperada, si ndi fiat tirada is pilus de conca. "Cumentì apa a fai a filai imoi? Chini at a castiai sa gruta mia a de dì?" naràt tzerriendu. De cussu momentu Luxia Arrabiosa no iat dromiu prus, ni a de noti ni a de dì, e fiat diventada unu coipira pitìu pitìu, e andàt arreu chenza de si fai biri intra is arrocas e is moris de sa gruta manna cosa sua. Candu intendis unu copira chi cantat, non ti acostis: est Luxia Arrabiosa chi prangit po su fusu cosa sua, chi agodràt sa gruta e is prendas de oru e de prata.